

涵芬樓古今文鈔

呂景端  
書藏

詞林典故  
古今文鈔

卷之四  
書牘

涵芬樓古今文鈔卷六十目錄

傳狀類

傳二

竹籥傳 顧大韶

王義士芳傳 張椿

黃忍江先生傳 耿定向

阿寄傳 田汝成

孫省祭鎗傳 莫如忠

死事傳 許相卿

邢布衣傳 文震孟

陳方伯傳 文震孟

隱君顧子武傳 文震孟



陶菴先生傳 高攀龍

徐文長傳 袁宏道

膠東二高士傳 周思兼

邱維屏傳 魏禧

劉參傳 魏禧

大鐵錐傳 魏禧

梁烈婦傳 王猷定

甯南侯傳 侯方域

吳伯裔伯胤傳 侯方域

徐作霖張渭傳 侯方域

乙邦才傳 汪琬

申甫傳 汪琬

邵宗元傳 汪琬

江天一傳 汪琬

宋烈女傳 汪琬

王烈女傳 汪琬

天同一生傳 王錫闡

無悶先生傳 應擒謙

汪烈婦傳 王槩

三烈婦傳 施閨章

戴南枝傳 潘耒

楊石民先生傳 張貞

廖氏傳 李良年

奇奴傳 馮景

王山傳 馮景

賀向峻汪參傳 邵長蘅

閻典史傳 邵長蘅

青門老圃傳 邵長蘅

侯方域魏禧傳 邵長蘅

誥封一品續順公夫人尙太君傳 楊繩武

明吳尙書傳 儲欣

白雲先生傳 方苞

方任二貞婦傳 方苞

高節婦傳 方苞

張清恪公傳 藍鼎元

烏蒙義役傳 常安

烏蒙烈女傳 常安

申自然傳 儲方慶

王崑繩傳 李堪

龐魏氏傳 李堪

陳孺人傳 王源

七賢傳 全祖望

司衡君傳 胡天游

江先生傳 劉大櫟

汪烈女傳 劉大櫟

張輦傳 李鐸

汪玉然傳 桑調元

王尙書傳 夏之蓉

翁孝子傳 夏之蓉

沈雲英傳 夏之蓉

尹太僕傳 李果

范文肅公傳 李果

范忠貞公傳 李果

方望溪先生傳 沈廷芳

黃貞女傳 朱仕琇

張烈女傳 王太岳

靳輔傳 王元啓

蔡鵬傳 程嗣立

朱竹君先生傳 姚鼎

劉海峯先生傳 姚鼎

黃徵君傳 姚鼎

張貞女傳 姚鼎

順德節孝婦黃氏傳 張九鉞

偃師三孝子合傳 張九鉞

涵芬樓古今文鈔卷六十

侯官吳曾祺纂錄

傳狀類

傳二

竹籤傳 顧大韶

竹氏之興。蓋顯於禹益之世。至周浸盛。有名策者。與端木氏之名方者齊名。並以強識聞。方專史職。而策好博小物。爲人修直無頗。帝命與投鉤氏互司利事。市民之分貨財不平者。咸質厥成。又善事鬼神。神降言必憑焉。巫覡莫及也。其族初在遼西。令支。齊桓公伐山戎。斬孤竹。乃遷中土。漢帝將立后。未定。侍臣請決之策。帝不能用。晉武卽位。問世數。策對以一。舉朝駭愕相顧。咎策失言。策不以屑意。然其言卒驗。後更名籤。仕齊梁間。爲諸王保傅。久之罷去。入唐爲陳武烈帝大祝。傳帝意。作韻語。簡奧類焦贛易林。入宋。復辟江東神幕。更爲長句。俳俚通俗。關壯繆侯

之改諡武安王也。倚勢辟之。王甚神聖。得籤佐。益著盼蠻。明興。爲王立廟。京師正陽門。命籤典謁。凡士之求官位者。商賈之求奇贏者。吉凶利鈍。無巨細。皆謁王。王倦於酬對。穆然無言。目籤使以己意答之。籤受命如響。巧發奇中。萬厯間名浸盛。太宰聞而賢之。薦於朝。命入吏部貳文選郎事。先是選郎多黷貨。或巽懦徇請託。有賢自好者。避怨譏。嘗惴惴衆推籤廉平。遂以選事委焉。每朝廷有大選。選郎第按故事注品官。其地之遠近。善惡劇易。與人宜否。一決於籤。太宰據籤所定成奏。上之天子。天子輒可其奏。內外無閒言。籤亦喜自負。浸以驕泰。入吏部堂。立太宰下。挺然無所屈。居嘗慷慨大言。堯舜以後。代無真人。使我得行其道。無懷泰豆之治。何足云哉。或問曰。子道已行矣。又何閒焉。籤曰。未也。鄉會試之榜。翰林科道之選。皆本朝所重也。數者我無一與焉。悉以畀吾。吾志快矣。士之失職者。傳其語爲口實。舉朝爲之不平。於是臺省交章劾籤怨望。宜下法司訊。天子曰。籤忠臣也。下法司。且死。將廷鞠之。期日。命籤聽於朝。公卿以下咸集。遣司禮太監詰籤。汝以小

臣。與聞大政。分已踰矣。猶懷怨望。何也。籤曰。臣何敢怨望哉。臣見中朝貴要人。共爲欺罔。以誤主上。受主上深恩。不勝孤憤。故發此論耳。主上試面詰在廷諸臣。吉士之選。不以貨取乎。科道之選。不以夤緣進乎。吏部之有頂首。科場之有關節。不累見白簡乎。使臣爲政。縱賢愚同貫。何至繆鑿若此。宋歐陽修知貢舉。惟朱衣之言是聽。夫朱衣第善點頭耳。臣乃善爲詩。四五六七言。皆如宿構。使修復知貢舉。舍臣無與共事。諸臣自視何如修。乃毀訾臣耶。於是公卿以下。同詞奏曰。籤侮朝廷。輕當世之士。無人臣禮。且籤在吏部。縱吏胥納選人賄。上下其手。籤陽瘖不問。詐爲愚忠。實敗國事。罪當誅。籤曰。敗國事者非籤也。諸臣綰結吏胥。共爲姦利。百方賣臣。臣疎於簡下。理宜有之。書曰。宥過無大。刑故無小。臣之見賣。過也。諸臣之賣臣。故也。主上以爲罪宜誰坐。且臣本山林人。自虞夏以來。修身數千歲。廁迹巫覡祝史之間。隨俗上下。主上特簡臣佐吏部。臣豈有心求之哉。臣不飲不食。無妻子之累。得賄將焉用之。主上若以臣爲不肖。卽日解臣吏部職。聽臣仍歸武安王。

廟得死所矣。臣謹伏階下以俟。太監以狀聞。天子曰。吾固知籤忠。命還部。掌選事如故。籤知世不容。忽一日棄官遁去。莫知所終。或曰。觀音大士挈以歸淨土云。野史氏曰。古之司銓者。權氏敬氏。皆名能其職。權氏善低昂人。錙銖無所假。類非長者。敬氏好面詆人。醜恨者至欲撲殺之。明哲保身。吾有憾焉。固未若籤之虛己御物。德怨兩忘也。或疑籤蓋巫祝之流。不宜在廊廟。是殆不然。太戊以巫咸爲相。成王侯卜正於滕。巫祝又豈可賤簡哉。籤遭逢聖世。致位津要。蟬脫穢濁。以全其軀。詩曰。逝將去女。適彼樂土。嗚呼賢矣。

王義士芳傳

張椿

王義士者。蘇之太倉人也。名芳。字尙義。一字德遠。別號南園。幼業儒。所交多名士。家頗饒。秉禮好施。而自奉甚約。晚喜閱瞿曇書。故殺之物不食。卽遇一螻。亦存悲濟。每每施棺掩骼。人以佛子呼之。聞從父中丞思質公被逮。裹糧奔赴。號失聲。有長洲簿告急。倒囊出百金畀之。請益。復以鄉人周氏所託金十錠貸焉。簿尋覈職。

亡去。遂委居第償周氏金。而草舍鸚鵡橋。晏如也。嘗訪舊小直沽。適慈谿費生廷槐。病滯旅舍。與語歎曰。奇士奇士。困頓塵土邪。移至寓所。共寢處。時其飢飽寒煖。而將護之惟謹。明年春。感異夢。攜生同舟南旋。復夢墮橋下。拯之不得。謂其不祥也。晨興。輒焚香誦經。爲之禳病。病良已。已而又病。便溺狼藉。市竈缶躬爲滌除。旁睨者不堪。無厭倦意。生數感泣曰。吾何以報先生。吾何以報先生。諸所需果餌藥物。無一不備。至潤州。舁易輕舫。欲就姑蘇名醫調理。次呂城。生病革。索筆作家書。恨不及終養二親。涕咽謂南園曰。生平心事。百不申一。天乎已矣。儻埋道傍。乞書慈谿費廷槐不瞑目之柩。語脫口而逝。時嘉靖癸亥三月二十有三日也。雙眸炯然。南園曰。古今日暮。孰爲彭殤。仲津達人而怛化邪。摩其眶者久之。猶不瞑。乃舉其首枕之股。拊膺而慰曰。四海一家。誰非兄弟。骨肉弗面。命也。何恫。況有四弟兩兒。親養有託。母戚戚爾。生喉間喟然有聲。目漸瞑。匿尸三日。舟人不知也。抵虎丘。稱貸營棺衾。手浴含殮。權厝半塘僧舍。訃其外舅華晴峯。轉告乃父汝登。踰月而

至。舉其柩。弗前。遲明。南園絮酒來哭送。乃舉環寺門而觀者。嘖嘖歎曰。不意今人中得見古人。有蘇蘇隕涕者。

論曰。風會日流。人情媮薄。肝膽楚越。爭較錙銖。當疾病患難時。卽骨肉容有規避者。視南園能無泚頰哉。昔郭仲翔負吳保安之骨。歸葬故丘。范巨卿夢張元伯之喪。素服追挽。彼皆久要。猶響千古之齒頰。乃若王君之於費生。萍逢莫逆。遂爲死友。千里維持。半塘輓別。其艱辛飢餓。有戚屬所難者。謂之義士。非與。予里人施牌。目擊其事。談甚悉。故爲立傳。以俟觀風者采焉。

黃忍江先生傳 耿定向

余束髮爲諸生。偃蹇黌序。蓋十年。所更庠師凡六七。大都如出一型。其不爲子雲所譏刺者。尠矣。嘗觀里中諸寒士。擔簦徒跣。爲俯仰事畜計。良辛苦也。歲時贖容。聚族而謀。則又以無能修儀爲楚。或稱貸拮据以往。至學宮前。頭岑岑加重。足僮僮不敢前。旣候之署。閤人預探。有贄已乃出見。見則往往以怒容盛氣臨之。已納。

贊。則手受。納袖中。默以指度。腴菲。稍如意。始漸降顏色相遇。否則怒益熾。設諸難督過。若責償。夙逋然。諸寒士低徊逡巡。曲辭竅說。第得免譙訶以出。則自幸矣。乃富室豪族子弟至。則輒款狎。杯酒交歡。甚至謔浪媒褻。無復夷等。而富室貴族子弟。出則揚揚捫腹。都騶奴橫行衢街間。覩朋儕旁若無人。目流視之而已。余每慨然太息焉。不謂禮義相先地。而陵夷至此極也。乃晚而始遇忍江黃先生。先生故未嘗爲嶄絕奇異之履。恂恂然貌若不勝衣。言若不出諸口。中介而氣和。色溫而語簡。與人無封而中鑒井井。余友彭公輔。故孤寒士。先生一見輒器之。謂余曰。彭生有仙風道氣。子得友矣。先生遇余兩人至。輒留坐竟日。談亶亶無倦。余兩人亦樂聽先生語。每至深夜忘歸也。先生嘗謂余曰。吾初授官。命下時。一夕念之不寐。竊謂官以訓導名。豈漫哉。卽字義從言從川。朝廷欲吾諄諄以善言與諸生相切劘也。而導字又從首從寸。則又欲吾首躬行以倡諸生。不可踰尺寸矣。非徒言也。顧名思義。厥任爲艱耶。先生故博洽多聞。從先生遊者。咸虛往實歸。欣得聞所未

聞。憶余嘗病。先生爲述范仲淹示子書曰。青年何苦多病。豈不以攝生爲意耶。門戶纔起立。宗族未受賜云。余聆之。惕然悚。蓋省古人之愛身。其志遠矣。又嘗述宓子之治單父也。其抑競崇恬。蓋感陽喬之喻云。而又時時爲余稱引其鄉先正。若虛齋之操履。次崖之風節。淨峯之長厚。其行事甚詳。竟日無一庸俗談也。維時邑庠生餘五百人。賢者孚。不肖者格。貧寒者依依若怙。而富貴驕蹇者。亦戢戢斂飾。先生故未嘗一厲聲色也。其時僚胥鄙且悍。日爭腐鼠相詬闕。而顧獨嚴敬先生。一日有緇衣欲葺梵宇。持籍丐助於先生。先生曰。嗟。吾亦孔氏之守祀也。吾目擊吾孔氏之宮。不足以妥靈。而不能謀。吾時心惻矣。而顧爲若謀耶。邑令聞感。乃亟爲葺理殿廡云。先生言不辯而中。類如此。尋先生陞海康。掌教行。邑之士紳弟子。追送者無慮數十。車馬塞途。先生瀕行。留衣一襲。遺代己者。寓相傳意。尋代先生者。雖不能盡繼先生志。然亦感先生意指。待諸生不虐矣。先生陞任後。越幾年。而余弟子健。補弟子員。弟時猶髻也。釋菜歸。而邑邑無歡。余詰之曰。父兄覩汝髻年。